



# Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma : Tir Yimyim

tiryimyim@aolima

tir yimyim

TAPAK 7

## Olympics: Archer Deepika Kumari quarter final nung tsükogo

## Vietnam tir To Lam Communist Party tekolakba kümogo



VOL. XXI ISSUE NO. 292 (ADOK 292) DIMAPUR AMUNGNÜ (SUNDAY) LUROI (AUGUST) 04, 2024 ₹ 5.00


### CNCCI-i AYO public rally nung adentsü ayongzüker Ceasefire ground rules ajanga Naga telungpur telok shinga kümzüka mayur

**Dimapur, August 3, 2024 (TYO):** NSCN-K(Khango)-i M/S KKB Rülho kibur K. Rülho nem tasüba temerenshi agütsüba aitsür aser Kohima Chamber of Commerce and Industry (KCCI) dang August 6 nü AYO rally nung shilem agitsü tetuyuba agütsür ta Confederation of Nagaland Chamber of Commerce and Industry (CNCCI)-i metetdaksüogo.

Naga National Movement ya Naga nunger ajak meyong lir aser Naga nunger shia shilem lir aser inyakyim balala ajanga yariteper. Ajisüaka sen meshiba magütsüba atema tasüba temerenshi agütsüba ya Naga National movement tangatetba

anema lir ta CNCCI-i ashi. Naga yimten telok 20 jungnüa lir aser telok ajaki amenotsü meshiba agütsütsüba shishilembartem asoshi tamakoktsü lir ta parnokisa ashi.

AYO-i August 6 nü public rally ayongba nung Kohima district nunga shishilembar ajaki shilem agitsüsa KCCI-i mapa inyaksü tuyur. Maneni confederates (District Chambers of Commerce) ajki iba rally nung adentsü aser pusema nungittsü atema teshimtet nübotem yoktsü mepishir, ta Media Affairs, CNCCI-i sangdong ka nung ashi.



Lt. Gen. Amarjeet Singh Bedi

**Kohima, August 3, 2024 (TYO):** Naga telungpur teloktem den ceasefire agreements aser ceasefire ground rules lateta aliba ajanga telok shinga nema tax aser sen sarutsü aser nübortem amokmerentsü tashi agüja mali ta Ceasefire Monitoring Cell/Supervisory Board Chairman Lt. Gen. Amarjeet Singh Bedi-i ashi.

India sorkari Naga telungpur telok 5 den ceasefire agreement lir. India sorkari 1997 nung NSCN (IM), 2012 nung NSCN (Unification), 2015 nung NSCN (Reformation), 2019 nung NSCN-K (Khango) aser 2021 nung NSCN-K (Nikki) den agitepa lir.

Naga telungpur telok 24 nungi telok pungui Centre den yimjung tenangzüktep agia lir.

"Yimjung bener arutsü atema ceasefire nung sign sütep. Naga yimten latetsü atema yimtenren olemtep tejakleni aotsü atema iba ya sign sütep" ta Honibarnü CFMC office nung osangbener den jembidang Bedi-i ashi.

Ceasefire Ground Rules lateta yur ceasefire nung sign sütepogo. Anungji India sorkar den

ceasefire agreement nung sign sütepa alirtemi Ceasefire Ground Rules sülen anidaktsüla ta pai ashi.

"Teloktem ketdangsüa aotsü atema designated camps, ceasefire identity cards, ceasefire offices amala agütsüogo. Iba ya ceasefire dak sendakba mapa inyaksü aser ceasefire maneni alitsü atema lir. Ajisüaka item ya public nem timtem agütsütsü mesüra Ceasefire Ground Rules alema inyaksü mesüra ozüngi memelaba mapa inyaksü atema lapoktsüba masü" ta Bedi-isa ashi.

"Nagaland nung ceasefire maparen ya Ceasefire Ground Rules sülen anidakba mita reprangtsü atema lir. Iba nung State sorkar, Nagaland Police, Security Agencies aser ni chairman ser telok balala nungi Ceasefire Supervisory Board dena lir" ta Bedi-i metetdaksü.

Mapang shia CFMG aser CFSB sendentem mena arur aser idangji mangatettep mesüra o atsütepba angatetteper, ta paisa ashi.

Tawa NSCN-K Khango onük atema CFSB office nung ken o

kecha benoka mali saka onok sasa ka benokogo. CFSB office-i iba ken o nung tenük yokdar kechiyong NSCN-K Khango-i Ceasefire Ground Rules alema inyakogo, ta Chairman Bedi-i ashi.

NSCN Khango-i onok dangi telangzüba ka yokba nung parnoki temulunger tenla (voluntary contributions) nung dang ajemdaker inyakba shiogo. M/S KKB Rülho kibur Kezhaleo Rülho dang par sorkar yezhabo nung lateta aliba onük kar ashi saka ibaji tasüba temerenshi ta mashileni meyipzüka jembir ta parnoki shidi nung shia lir, ta Bedi-i metetdaksü.

Nagaland Police-i iba ken o atema suo moto FIR ka benokogo aser parnok dang bushisüngdang asütsü mepishiogo. Aibelenertem ozüng tapet agi merenshitsu, ta CFSB Chairman-isa ashi.

NSCN-K Khango-isa CFSB dang parnoki ceasefire ground rules sülen anidaktsü aser tekaratiba nung iba ken o angatetteptsü nangzükgogo ta paisa ashi.

CFMC/CFSB-ia Naga telungpur telok balala indang 'yezhabo' (constitution) agizüker asü koda ta osangbeneri asüngdangdang "ozü office bo laid down agreements aser ground rules nung ajemdaker inyaker aser teloktem sasep nung ketdangsüba nung shilem kecha mali" ta Bedi-i langzü.

"CFMC/CFSB office-i tekaratiba nung ken o timi angatetteptsü atema yariteptsü mulunga lir. Ozü office yabo ceasefire ground rules ketdangsütsü atema dang lir aser ozüng mapa ketdangsürtemji state aser centre sorkartem lir" ta pai shisem.

### Mokokchung Police-i nashi auyartem apu

**Dimapur, August 3, 2024 (TYO):** Mokokchung Police-i July 29, 2024 nü Tsutapela Check Gate nung nashi auyar ana-Hasim Ali aser Zakir Ali na puogo.

July 28, 2024 nü Longtho nung alir kati Longtho Police Station nung par nashi pezü samaba ken o ka benok. Iba sülen police-i bushisüngdanga arudang nashi auyar telok kati Longtho nung nashi pezü aser Moayimti yimtsüng nung nashi ka auyaba osang angazük.

Nashi auyartem jagi pick-up truck ka nung nashiji Assam-i bener ao ta osang angazük aser tenük kuli agütsürtemi ashiba ama police-i gariji mita aodang Bolero Pick-up gari (B/R No. AS03C 5507 white colour) apu.

Idangji nashi auyar ana apu aser tena dang asüngdangya asüdag iba mapa nung par pungui shilem agiba nangzükg. Nashi auyaba mapa nung Balijan Nutan Mati, Mariani nung alir gari kibur Alfred aser Rinku na dena lir ta ashi. Parnoki nashiji Amguri Char Ali, Assam nung yokdoko ta tenatisa ashi.

Iba osang nung ajemdaker

OC Longtho PS-i anir telok ka Maraini nung oa tai tongloksür ki mita ao saka parnok jena oadoker liasü.

Mokokchung Police-i tanüngba nisungtem aputsü atema meranga bushitepdar aser police station ajaki ibala mapa noktangtsü atema kümküma alitsü metetdaksür, ta Addl. Superintendent of Police & PRO, Mokokchung-i sangdong ka nung ashi.

Mokokchung SP-i OC Longtho PS aser pai aniba telok dang mapang shitak nung arrtsülen nashi auyartem apuba atema tenüngsang agütsüogo.

Assam Tribune nungbo Mariani, Jorhat kübok Nakachari nungi lanur ana Longtho, Mokokchung nung pua lir ta osang ka sangdonga liasü. Ajisüaka tanü Mokokchung Police-i iba nisung ana ya teti nashi auyartem lir ta kuli agütsüogo.

Mokokchung district kübok Longtho nung lanur ana ya Naga nunger telok kati pua lir aser Naga nungertemi tena chioksü atema nisung asem den Rs 2.50 lakh meshir ta Assam Tribune nung osang sangdonga liasü.

### Scheduled Castes And Tribes Committee nung MP Phangnon Konyak shimok

**Dimapur, August 3, 2024 (TYO):** Committee for Welfare of Scheduled Castes and Scheduled Tribes nung Nagaland nungi Rajya Sabha MP Phangnon Konyak shimokogo.

Phangnon Konyak-i la Committee nung shimokba atema Vice President aser Rajya Sabha Chairman Jagdeep Dhankhar, Prime Minister Narendra Modi, Union Home

Minister Amit Shah aser Union Minister Kiren Rijiju nunger dang pelaba metetdaksü.

Phangnon Konyak ya Nagaland nungi mezüngbuba Rajya Sabha MP lir aser Centre sorkar committee nung la shimokba ya northeast atema kanga tongtipang lir.

Iba committee ajanga India nung scheduled castes aser scheduled tribes atema inyaker.



Tuensang District Disaster Management Authority-i August 3, 2024 nü Tuensang Village, C/ Khel Local ground nung relief camp ka lapokba angur. Tuensang kübok Phenjang sector aser NST Sector nung anentsüh ajanga nisung 768 dak kongshirtem asoshi iba relief camp lapoktsü aser mezüng anogo nung nisung 64 tashi aruogo ta osang angazüker. Külen, anentsüh nung yirur kibong ka Tuensang District Hospital nung anioka anepaludar.

Advisor A.Pangjung-i Asangma yimtsüung nung Platinum Park semzüksü



MLA & Advisor, A Pangjung Jamir den ASTD züngsemtem Platinum Park, Asangma yimtsüung nung tangokba noksa nung angur.

**Dimapur, Luroi/August 3 (TYO):** Tuli subdivision kübok Asangma yimtsüung nung August 2 nü Platinum Park lapokba sentong ka agiogo. Iba park ya Asangma Shisashir Telongjem Dimapur (ASTD)/ Asangma Students' Union Dimapur-i achaayanga yanglu aser MLA & Advisor for Fisheries and Aquatic Resources, A Pangjung Jamir-i lapokja liasü.

Park lapokba sentong nung o jembiba mapang Advisor-i, iba amala tebur tajung park ka yanglutsü atema ASTD-i jenjang tajung agiba atema tenüngsang agütsü. Paisa,

yimdaklirtem dang tarutsü nung alima penzürtem atsüa arutsü atema iba amala maparen tajung benoka inyaksü ajungshia liasü. Kaziranga National Park ajanga Assam sorkar küm nung revenue crore aika aazükba indang tarishitsü benoka jembia Advisor-i, nübürtem dang tourism atema alinük tebur tajung moaja aliba maangka agütsü ajungshi.

Tatem nung Jamir-i, sentepa aliba lokti dang Platinum Park ya mapang ajak nung merekmejuaya yutsü atema pei khuret ama angateta inyaksü ajungshia liasü.

Sentong nungsa Moatemsu Imsong, Vice President, ASTD, Moalong, President, AST, R Jongponglole, Tatar, Asangma Village council aser S Bengdang Imsong, Park Construction Committee nungeria o tatsütsü jembia liasü. Convenor of Park Construction Committee, I Sendong Jamir-i o jembiba mapang, iba park ya 2023 küm Septembe ita nungi yanglu tenzük aser ita 10 shi inyakba sülen tembangogo, ta ashi. Iba park ya Asangma Students Union (ASU) küm 75 ajungtsü aliba nüngdem nung yangluogo.

Suruhuto nung skill development training sentong agi

**Dimapur, Luroi/August 3 (TYO):** Mobile skill morung sentong kübok yimtsüung nung aliba tetsürtem atema hopta ana atema skill development training sentong ayongzükä katsüba August 3 nü Suruhuto jila nung tembangogo. Iba sentong nung Deputy Speaker, Nagaland Legislative Assembly, Toiho Yephthomi alakteta jaoker liasü.

Sentong nung o jembiba mapang Yephthomi-i, iba training ya tetenzük dang aser ano aika ayongzükä katsütsü ta ashi. Paisa, tarutsü nung pai skill

development sentong balala agütsütsü ta ashi. Deputy Speaker-i training nung shilem agir parnok 25 nem kuli kakat aser sewing machine tem lemja liasü.

Sentong nungsa TrongdibaTongpi T Sangtam-i, Department of Employment, Skill Development & Entrepreneurship dang nübürtem ajangzükadaksütsü atema training sentong tajung ayongzükä katsüba atema kanga pelaba lemsatop. Paisa, lokti atema aser talisa tetsürtem

atema aria bilemtsüba atema Deputy Speaker dang kanga pelaba lemsatop.

Maneni sentong nung Suruhuto Area nungi lenirtemi o tatsütsü jembia aser parnoki department dang kanga pelaba lemsatop laisü.

Iba sentong ya Employment Officer Zunheboto, Kahoto K Zhimomi lenisüba nung agia liasü. Training ya department of employment skill development and entrepreneurship government of Nagaland-i ayongzükä katsüogo.

Dimapur nung tasümgang ka nguteta lir

**Dimapur, Luroi/August 3 (TYO):** August 2 nü nikongtsütsü 3 ako meta, Nagamese Church anasa Burma Camp, East Block Colony, Dimapur nung local phone ajanga East Police Station nem nübürtem osang agüja liasü.

Osang angazükba sülen East PS duty party iba tesemi aritepa ao aser ken o bushisüungdang liasü. Ken o asadanga sülen asüsang ya arishi küm 40 shi asütsü ta asatetogo aser pa

asüba dak sendakba nung temulung malemstsüa kecha ken o sendaka aliba mongutet. Temzüng ozüing dak ajemdaker tinyaktsü maparen ajak tembanga inyakba sülen tasümgang ya examination aser identification atema District Hospital morgue-i benerogo.

Ken o dak sendakba nung asüsanger kinunger aser medemerterem dang East Police Station, Dimapur, Officer-in-Charge (Mobile No. 7085055020) den tongteprateptsü mepeshia metetdaksüogo.

Yingli College nung Arts & Crafts workshop agi

**Dimapur, Luroi/August 3 (TYO):** Yingli College, Longleng, Women Development Cell-i ayongzükä August 2 nü Arts and Crafts dak sendakba nung workshop ka ayongzükä agiogo.

Workshop lapokba sentong nung mejeta jaoker Assistant Chief Technical Officer, KVK, Longleng Dr Lily Ngullie-i, melenshia aoba lima ka nung skill development nüngdakba aser nükla indang lemsatopa liasü.

Soap making, candles, wax sachet, bookmarks, beads, hair ornaments aser paper crafts dak

sendakba nung teaching faculty, Dr. Vizolenue Sophie, Kiriahungle Haihing, Lochumbeni Shitiri aser Konchem nungeri achaayanga practical sessions ana agia liasü.

Workshop shibanga sentong nung Dr.B. Henshet Phom, Vice Principal-i anküp o jembia liasü. Training balala agüja classroom adena orr tangazükba agüja lenla ajak nung renloka odaktsütsü nükjidong nung iba workshop ya ayongzükä agia liasü. Ajak senteper iba workshop nung kaketshir 12 dak temai shilem agia liasü.

Kohima nung MPCDSR/RMNCAH+N lepareprangshiba senden amen



**Dimapur, Luroi/August 3 (TYO):** District Health Society, Kohima, Department of Health & Family Welfare, NHM den Chief Medical Officer office nunger longjem MPCDSR/RMNCAH+N dak sendakba nung lepareprangshiba senden ya August 1 nü CMO conference hall nung menogo.

Senden nung CMO Kohima, Dr. Leamneyi Konyak-i, lokti pela agizükba o jembia aser senden nung dena alirtem dang pei inyakba mapatem odangtetsüsa inyaksü ayongzükä liasü.

Senden nung shisalen sayurji Dr. Longri Kichu, UNICEF liasü aser Maternal & Perinatal Child Death Surveillance Review (MPCDSR) dak sendakba nung sensaksema liasü.

Senden nungsa DPO (RMNCAH+N) Dr. Khrievilhou Nakhro-i, ROP-NHM kübok Key performance Indicators, Adolescent Health

kübok inyakyim aser Child Health -SBA, JSY & JSSK components kübok tongtibang inyakyimtem indang presentation agüja liasü.

Kasa mapang nung DPM Avikali Jakhalu-i, HMIS, RCH Portal & ANMOL, Anemia Must Bharat aser Family Planning kübok tongtibang inyakyimtem indang metetdaksü.

Maneni Dr. Imnanoktsung Longchari, DPM (QA)-i, SUMAN, Laqshya & MusQan, HRP tracking & ePMSMA indang aser Dr. Katila, MO (RBSK)-i, RBSK kübok tongtibang inyakyimtem indang metetdaksü aser DCM-isa, VHSND review & Community Participation indang metetdakja liasü.

Senden tatem Dy. CMO Dr. Imchatoshi-i senden nung shilem agirtem ajungshi aser pei akokba tashi bendanga agüja inyakba atema kanga pelaba lemsatopa liasü.

| NAGALAND POLLUTION CONTROL BOARD   |         |                            |              |                  |            |  |
|--|---------|----------------------------|--------------|------------------|------------|--|
| Signal Point, Dimapur - 797112, Nagaland<br>Tel.: 03862-245727, TeleFax: 03862-245726<br>Website: www.npcb.nagaland.gov.in e-mail: npcb2@yahoo.com |         |                            |              |                  |            |  |
| AMBIENT AIR QUALITY FOR KOHIMA AND DIMAPUR CITY<br>KOHIMA ASER DIMAPUR NUNG MOPUNG MERÜK-MEMERÜKBA JENJANG   |         |                            |              |                  |            |  |
| Sl. no   | City    | Location of air station    | Type of area | Monitoring dates |            | Permissible limit As per the National Ambient Air Quality Standards<br>"Iba tasazük alemabo metudaktsütsüla" |
|  |         |                            |              | 23.07.2024       | 25.07.2024 |  |
| 1  | Dimapur | Bank Colony                | Residential  | 31               | 31         | 100 µg/m <sup>3</sup>  |
| 2  |         | Dhobinala                  | Commercial   | 70               | 81         |  |
| 3  |         | NPCB Office, Signal Colony | Residential  | 28               | 32         |  |
| 4  |         | Tenyiphe, Chumoukedima     | Commercial   | 23               | 17         |  |
| 5  |         | Nagarjan                   | Residential  | 26               | 29         |  |
| 6  |         | Viola colony               | Residential  | 31               | 37         |  |
| 7  |         | Burma camp                 | Commercial   | 68               | 62         |  |
| 8  | Kohima  | Opposite NST Office        | Residential  | 36               | 28         |  |
| 9  |         | PWD Junction               | Commercial   | 43               | 42         |  |
| 10   |         | High School Junction       | Commercial   | 52               | 51         |  |
| 11   |         | Midland (Upper)            | Residential  | 34               | 19         |  |
| 12   |         | Forest Colony              | Residential  | 38               | 28         |  |

Iba osang ya nübortem ajangzüksü atema Nagaland Pollution Control Board-i agütsür.

### Wayanad anentsüh lendong nungi kümzükertem atema jila tasen tentettsütsü



August 03, 2024 nü Wayanad district nung anentsüh lendong atalokba tesem nung tasumang bushidang tangokba noksa nung angur. Anentsüh lendong atalokba sülen tanü agi anogo pongunübuba kümzükba maparen inyakdar.

### New Delhi, August 03

(Agencies): Kerala state sorkari, Wayanad district kübok Mundakkai region nung anentsüh lendong nungi kümzükertem atema jila tasen ka tentettsütsü, ta metetdaksüogo.

Chief minister Pinarayi Vijayan-i, anentsüh lendong agi kongshirtem tanaben asentenshir taküm yangershitsütsü asoshi sentong renemogo aser kobi melii Education Minister-i Wayanad semdanga tanurtem nem shisaliok methitemi agütsütsü asoshi inyaksü, ta metetdaksü.

"Iba lendong nungi kümzükertem taküm tanaben asentenshir yangershitsü asoshi sorkari sentong renemogo. Tesem tajung ka asadanga sülen jila tasen ka tentettsütsü.

Tanurtem nem shisaliok methitemi agütsütsü asoshi Education Minister-i Wayanad semdangtsü," ta paisa metetdaksü.

Anentsüh lendong agi kongshirtem taküm tanaben yangershitsütsü asoshi Leader of Opposition V D Satheesan densema aikati nangzükogo. VD Satheesan-ia, "Congress lenir Rahul Gandhi-i ki 100 sütsütsü," ta sangdongogo.

Karnataka chief minister Siddaramaiah-ia ki 100 sütsütsü nangzük, Sobha Realty Group-i ki 50 aser Kozhikode nung aliba Business Club-ia ki 50 sütsütsü nangzükogo.

Vijayan-i item telok balala dang pelaba lemsatepba den külemi nungtugu nisungtem aser Congress lenirtemi Chief Minister's Disaster Relief Fund

(CMDRF) atema tenlatsü nangzükba metetdaksü.

Taoba mapang Wayanad MP, Rahul Gandhi aser Congress lenir Priyanka Gandhi Vadra natia Wayanad nung anentsüh lendong agi kongshiba kibongtem, lendong atalokba tesem aser relief camps-a semdanga takoksa angurtem ajuruogo.

Mongintemi, anentsüh lendong atalokba ya meteorological kulitem ajanga dang masü saka climate change aser asalentong makai terenlok mapatem inyakba kulitem ajanga lir, ta metetdaksü.

Mongolbarnep (July 30) Wayanad nung anentsüh lendong atalokba ajanga yimtsüing aika samaogo aser nisung 350 dak tema süogo.

### Centre sorkari BSF Director General aser Deputy na agienogo

New Delhi, August 03 (Agencies): Jammu & Kashmir nung kiralongra tatalokba kanga bulua akümba nung ajemdaker Centre sorkari BSF Director General (DG), Nitin Agrawal aser pa indang Deputy, Special DG (West), Y B Khurania na pepei state-i tangsa meyipa yokang, ta tetuyuba agütsüogo.

BSF nung sepaia lakh 2.65 lir aser item sepaitemi India anüolen tsütsü Pakistan den arrtsülen anüker aser anüdoklen tsütsü Bangladesh den arrtsülen anüker.

Taküm Jammu & Kashmir

kübok Rajouri, Poonch, Reasi, Udampur, Kathua aser Doda district tem nung kiralongra tatalokba balala nung security sepaia 11 aser village defence guard (VDG) ka densema nisung 22 süogo. Taoba ita Kathua aser Doda district na nung kiralongrartema pongu kshasetogo.

Agrawal ya 1989-batch Kerala cadre officer ka lir. Yaküm June ita nung pai Border Security Force Director General mapa agizüka liasü. Ano külen Khurania ya 1990-batch Odisha cadre officer ka lir aser pa ya Pakistan den arrtsülen Special

DG (West) lir.

Appointments Committee of the Cabinet (ACC)-i sangdong balala ajanga, sepaia ketdangser anapronglaji kümsük matongdangyongi pepei menden nungi tangsa anentsür, ta metetdaksü.

J&K nung kiralongra kanga bulua atalokba sülen Centre sorkari J&K Union Territory nung sepaia tali yoksemogo. Border Security Force (BSF) sepaia 2,000 Odisha nungi aniteta Kashmir-i yokogo aser Army tem den yariteptsü asoshi Assam Rifles sepaia 1,500 Kashmir-i yoktsü.

## India-i alima nung chiyungtsü security atema inyaker: PM Modi

New Delhi, August 03

(Agencies): Ato kilonser Narendra Modi-i, India ya alima nung chiyungtsü peria aliba linük ka kümogo aser India-i alima nung chiyungtsü aser nutritional security atema inyaker, ta metetdaksü.

32buba International Conference of Agricultural Economists (ICAE) tetenzük sentong nung jembidang Ato kilonser Modi-i, Union Budget 2024-25 ya sustainable agriculture nung ajemdaker yanglu, ta ashi.

Küm 65 tejaklen India nung iba conference ya ayongzüka agi, aser iba mapang nungji India nung aluyimba aser chiyungtsü security tsütsü tayongzükba tulu liasü, ta pai ashi.

"Tangbo India ya chiyungtsü peria adokdaksüba linük ka kümogo. Alima nung mamatzü, menjang aser spices teimtiba adokdaksüba linükji India lir," ta pai ashi.

Iba dak alia alima nung tsük, süngjanglijang, aonsotsü, kümpa, shini aser süngo teimtiba adokdaksüba linüktem rongnung India ya jenjang tanabuba nung lir, ta pai ashi.

"Khen mapang ka nungbo India nung chiyungtsü security atema alimai tebilemtsü kaja liasü. Tangbo India-i alima nung chiyungtsü security aser nutritional security atema inyaker," ta Ato kilonserisa metetdaksü.

Iba conference nung linük 70 nungi tejaoker 1,000 dendar.

Küm asem shia khen ayongzüka agiba conference ya



Narendra Modi

International Association of Agricultural Economists-i ayongzük.

Iba conference ya August 2 nü tenzük aser August 7 nü tembangtsü. Taküm iba conference omenji "Transformation Towards Sustainable Agri-Food Systems" lir.

Modi-i, India-i mozü mamshii aluyimba jenjang ajungkettsür, ta ashi.

Iba conference nung research agir lanurtem aser mongintem nem parnoki inyaktetba mapatem metetdaksütsü atema sabang agütsütsü.

Iba conference nükjidong ya research agiba institutes aser universities longjemdaksütsü, national aser international level nung mapatong balala renemtsü, India nungeri aluyimba nung ajangzüktebatem sayatsü aser digital agriculture aser sustainable agri-food systems sayatsü nükjidong nung ayongzük.



August 03, 2024 nü New Delhi nung Auto Rally nung shilem agirtem noksa nung angur. Sen taila amshiba aser ozüing alema shibelenba anema awareness agütsütsü nükjidong nung ayongzükba sentong ya BJP MP, Praveen Khandelwal-i tenzüksü.

Form No. 3  
[See Regulation-15 (1)(a)] / 16(3)

**DEBTS RECOVERY TRIBUNAL GUWAHATI**  
Suwarna Bhawan, House No. 12, New Town Path,  
Near Hanuman Mandir, G.S. Road, Ulubari, Guwahati- 781007 (Assam)

**Case No.: OA / 236 / 2018**

**Summons under sub-section (4) of section 19 of the Act, read with sub-rule (2A) of rule 5 of the Debt Recovery Tribunal (Procedure) Rules, 1993.**

Exh. No. 4402

**BANK OF BARODA**  
- VS -  
**SUWAMONGLA AO**

To,  
**(1) SUWAMONGLA AO**  
D/W/S/O- Wife of Hepong Phom, Resident of Signal Angami Phom Colony, Dimapur, Nagaland, House No. 237, Block 4, PIN- 797112.

**JAOKER**

14.06.2024 anogo nung Hon'ble Presiding Officer/Registrar matsüngdang OA/236/2018 benok.  
Rs. 21,47,795.86/- sentsüh atema iba Act kübok section 19(4) application nung ajemdaker na anema (OA) benoka Hon'ble Tribunal-i/jaoker/ notice agütsür (application den documents copies densema lir).  
Iba Act nung section 19 kübok sub-section (4) nung ajemdaker defendants dang teküboklen aliba tetuyuba agütsür:-  
(i) Iba case defend asürtemi tajaba agütsüba sülen anogo semer nü tsungda relief asoshi mepishibaji kechiba magütsütsü, iba kulji sayatsü metetdaksür;  
(ii) Original application nung serial number 3A kübok applicant-i shia aliba kiojen aser assets dak alia tanga kiojen aser assets sangdongtsüla;  
(iii) Original application nung serial number 3A kübok shia aliba kiojen aser assets ayoktsü mesüra item kiojen atema inyaksangshitsü memelar;  
(iv) Security interest atema inyaksangshiba dak alaka Tribunal dang nungi jelia temelaba magii original application nung serial number 3A nung shia aliba kiojen mesüra tanga assets ayoktsü, lease asütsü mesüra tanga kecha inyaksangshi masütsüla;  
(v) Ordinary business ajanga secured assets mesüra tanga assets aser kiojen nungi yokzükba senji security interest soita aliba bank mesüra financial institutions indang account nung deposit asütsüla.  
Nü dang tezüluba nung sangdong applicant nem agütsütsü tuyur aser **20.08.2024** anogo nung anepdang **10:30 ako** nung **Presiding Officer** matsüngdangi arutsü tuyur, yamaji meinyakra application ji angadangtsü aser na meliaka telemetba agütsü.  
**26.06.2024** anogo nung tsünglanglen kü meyongnem den iba Tribunal indang seal agütsür:  
Registrar,  
Debts Recovery Tribunal, Guwahati



## TIR YIMYIM YIMOBILEM (EDITORIAL)

DIMAPUR AMUNGNÜ, AUGUST (LUROI) 04, 2024

### Takok sülen sarasademba

**A**senok aikati lendong timtem aser shisabolu ka agi atongba mapang nung dang jet ta sarasademtsü bilemtetter. Tamakok angutsü ama asü dang mamadoki takok meshia sarasademmer, shirang dang tanepsü meshia sarasademtsü mamar aser asenoki renemba sentong ka takok ngunü dang tsüngsang mopong aser alima tensa mapang tajung moajang ta sarasadempet sarasademmer. Ajisüaka, tanübo ken asenoki asensasa asen taküm, asen mulungjang aser asen mulungsentsü meyipa reprang dang di. Asenoki sarasademba ama lendong timtem aser shisabolu nungi kümzükogo, takok agütsüogo, shirang anepsüogo aser tsüngsang mopong aser alima tensa mapang tajung moaja aseni renemba sentong takok ngudaksüogo. Asenok tangbo tangar tsüngdanga nümadangtet dangteta lir, anungji kanga pelaa alir. Ajisüaka, asenoki item takok aser temoatsü anguba sülena sarasademdar ma? Kenü nikong dang ka Yisui tetsür tanur mezü ngi tebur tain meyirijang pongo aliba telok tuluka nem ango ana aser amtsük pongo agi tebok sünga chiyongdaksür külena ano amtsük aser angoji molok terana sünga bendentetba otsü ka Mark tapu 6 nung shia angur. Iba anogoji Yisu asoshi nübortem tsüngdang takok tulu anguba anogo ka liasü. Ajiki ngua lia takok tulu angu nungji aser yaseta aliba nisung meyirijang pongo dak tali tebok sünga chiyongdaksür asünungji, iba takok manung pelashishia anisüngzüka iba aonungjibo mejangtsü baji Yisu atema mapang tajung ka liasü. Ajisüaka, Mark 6: 46 nung ashir, telokji chiyonger senshi aser nütsüngtema ajungshia Bethsaidai yoker külen, Yisubo Pa kija tenem leni sarasademtsü atu. Iba denji asen taküm aser yimya medemdangra, asenokibo benjong tilaka takok ngua agütsütet nunga, iba sülenjibo sarasademtsübo amadoker sentepia mao anisüngzüka amonger. Asenokibo mapa tilaka nung takok angu nunga mesüra senotsü tera ajangzük tet nunga, iba takok aser temoatsü anguba sülen azü ngmeyerak dak mesüra tenem nung mesüra sentep kidang oagi sarasademtsü baji yotsür, kidanga mener sarasademtsü amadoker. Ajisüaka, asenok kanga kümdangtsüba kaji, alima nung teti takok sülen tamakok anidaker aser temoatsü sülen lendong anidaker. Ibaji asen Kümtet dakba Yisu Khristaibo meteta dang liasü. Aji oda, Yisu tenem nung tuagi sarasademba mapang, tebu Tsüngremibo iba aonungjisa Par nütsüngtem tzüyim yipru nung timatemtsüba lendong meteta dang liasü. Ashiko, tenüngsang agütsüba den külemi item ama manguba timtem aser lendong nungi kümzükang ta Yisui tenem nungji tebu dang sarasademmer asütsüa akok. Aji oda, tebu Tsüngremi Pa chir Yisu Khristaji tarutsü lendong madak takok angutsüsa renemtsü. Iba tashi aser taochi jagi iba aonung nütsüngtem tzüyim yipru lendong nungi Yisui kümzük. Iba lima nung asenoki inyakba mapa nung takok ngur külen, asenoki aiben item takok aser temoatsüji asensasa inyaktet aser angu ama bilema Tsüngrema amar pelatepa anisüngzüka alitsü meranger. Ajisüaka, idangji ajungbena lendong ka agi asen taküm aser kibong akümbanger, idangji dang asenoki sarasademtsü bilemtetter. Ajisüaka, sarasademtsüba ya asen shisabolua aliba mapang kija nüngdaker masü saka takok aser temoatsü anguba mapangang tenüngdakba, kechiyong sarasadem ajanga dang Tsüngremi asen taküm tarutsü anogotem asoshi renemtsür. Ibaji mamali.

## OLEMSABANG

### MOATSÜ ASER TSÜNGREM-MONG (INDANG KAKET NUNG ZÜLUA YÜTSÜBA SAMANIR-TEM)

~ A M Toshi Jamir, Retired Director, Lengrijan, Dimapur

Okila:2024 küm atema Moatsü aser Tsüngrem-mong benjongya süitema ogo, saka teronembo anosa lir. Anungji yangi ocet ka lemsateper.

MOATSÜ aser TSÜNGREM MONG benjong-ya asenok Aor-tem asoshi tamaitsü (Identity) tongtipang-tem rongnung ana lir. Item benjongya, mapang/densa den apet amongba ajanga-a asenokji Aor-a ta talisa bendangeri melamela meteter.

Ao lima nung mezü ng asen oshi nung asenoki osang-kaket adokbaji 1932 küm nungi liasü (THE AO-NAGA MESSENGER). 1937 küm nungibo iba osang-kaket tenü ngji AO MILEN ta tenü ng melenshia jatsü. Iba Osang-kaket ajanga nüburtemi osang-tsüsang aser tebilemba tem (Ocet/articles) lemsatepa aru. March 1939 kum, AO MILEN adok nung, "KECHIBA LONGTROK" ta ocet tenü ngji jatsüa zülur Aor tashi-temeteter kati adokdaksü. Iba ocet anema-ji 6.4.1939 anogo nung obendang agutsü aser ocet züur dang Sen Rs.50 achi (fine imposed). Ibaya Dobashi Court Mokokchung nung atalokba. Iba anogo ya Ao lima otsü (history) nung ocet zülur/kaket atema tatalokba tulu ka liasü südi ta tanü lanurtemi azünger (Source:Nagaland Post:21.05.2002).

Küm 98 shi süia aruogo, British nungger yimsüsür Mr.J.P.Mills,( Indian Civil Service) shiba Mokokchung nung küm tenet shi (1918-1924) Sub-Divisional Officer(Civil), inyaka liasü, pai 1926 küm adokba kaket (THE AO-NAGAS) nung Moatsü aser Tsüngrem-mong indang zülüja lir. Iba sülenji ano küm 45 shi süia or külen, 1979 küm,Nagaland Government-i Mokokchung District Gazetteer kaket ka adok, kong Moatsü aser Tsüngrem-mong indang zülusema lir.

Note-Ni ajangshia aruba tem/bushitetba (research) tatalokba khar tsünglanglen agutsür.Asür jakdang yangibo LATE ta zülua mesayur.

Kaket/Ocet ka zülutsüba nungya timtem/khuret aika ket-ta lir.Saka shirnoki, talisa lanurtem ajangzüktsü asoshi kaket (Moatsü aser Tsüngrem-mong enoksema) zülua doktsüogo parnokji bilemtettsü aser nüburtemi meteta alitsü atema iba ocet ya zülur(to acknowledge their contribution and sacrifices).Moatsü aser Tsüngrem-mong indang enoksema züluba kaket-tem khar yangi shisemer. (1).Aor Tatakru tsu,1947, by Imtilepden Pundit;(2). Aor Sobaliba aser Temzü ng Ozü ng ,1981by Mr.L.Imti Aier ,retired Circle Officer; (3).Christianity versus Ao-Nagas,1984,by.Tajen Ao ,Advocate & former Principal, Law college,Mokokchung; (4).The Religion of the Ao-Nagas, 1990, by Bendangangshi,ex-MLA, aser I.T.Apok Aier ,(retired) Deputy Director,School Education; (5).Asen Sobalibaren,1992, by N.Talitemjen Jamir,retired Secretary to the Govt of Nagaland; (6).Takosungba Ao:Longzuk Long;1992, by Panger Imchen(Note-Moatsü aser Tsüngrem-mong indang Takosungbai otsu ashiba iba kaket nung enoksema lir);(7).Ancient Ao-Naga Religion and Culture,1993,Panger Imchen, Bth,BD,M.Th,formerly Research Scholar and Lecturer in Theoglogical colleges(CTC&DPC); (8).Tanu Aor Sobaliba Jenjang aser Tarutsu Nukla,1997,Edited by Dr.Supong Keitzar (Moatsü aser Tsüngrem-mong indang Imkongmar-i(IAS) züluba-a densema lir;(9).Sobaliba Penzü Kakat,2010,by Er.Kazükaba, retired SDO; (10).Ao-Naga Customary Law and Prictices,2012, by L.Sosang Jamir, retired Deputy Commissioner (Judicial),Nagaland; (11). Nagaland:Land of Festivals, 2012; by Prof.A.Lanunungsang.

(Maneni asü ng adok nung...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## 'Jesus Revolution' baptism sentong nung nisung 2,000 bapti



Corona Del Mar, California nung aliba Pirate's Cove Beach nung Jesus Revolution Baptism agidang tangokba noksa nung angur.

**August 03, 2024:** Sayutsingir Greg Laurie indang 2024 Harvest Crusade nung nisung meyrjang aika adenba sülen July 27, 2024 nü Corona Del Mar, California nung aliba Pirate's Cove Beach nung Jesus Revolution Baptism tanabuba sentong nung nisung 2,000 shi baptiogo.

Taoba Honibarnü Harvest Ministries-i ayongzükba 2buba Jesus Revolution Baptism sentong nungji pastor tem aser Arogo lenirtem parnok 70 dak temai nisung 2000 shi baptisüogo.

Iba sentong ya California nung amenoka aliba Harvest Christian Fellowship-i ayongzük aser Evangelical pastor, Greg Laurie leniba nung agia liasü.

Iba jakdang Angel Stadium nung 2024 Harvest Crusade agidang nisung aikati Yisu Khrista nem taküm bendanga agüja liasü.

Pirate's Cove Beach nung baptirtem nem New Believer's Bible kaka agütsü aser partner Arogotem nung adentsü atema jaoka liasü.

"Iba dak alia parnoki Harvest indang Gospel of John digital study guide nunga adentsü melungtetba den külemi Harvest Discipleship online nunga adentsü jaok. Parnoki angati online courses agütsür aser

tanela nung aintsü atema tanga resources balala agütsür," ta pastor Greg Laurie-i osangbener nem metetdaksü.

Yaküm July ita nunga Harvest-i ayongzükba Jesus Revolution Pirate's Cove Beach Baptism nung nisung 4500 shi baptia liasü.

Tesüiba ita 12 tsüngda Pirate's Cove Beach nung nisung 6,500 dak tema baptiogo, aser iba ya Tsüngremi asen lima nung sayatena mapa inyaksü temaitsü sayur asütsü akok," ta Laurie-i metetdaksü.

1970s mapang California nung tanela asentenshi milak tulu jangruba dak sendakba nung pai, "Item ajak ya Southern California nung ataloker. Iba tesem nung tanela asentenshi milak tulu liasü, koba dang Jesus Revolution ta ajar," ta pai metetdaksü.

"Küm 50 tejaklen nisung jenti baptiba tesemji Pirate's Cove Beach ya liasü," ta pai ashi.

Laurie-i, "2023 küm adokba 'Jesus Revolution' film nung 1970s mapang revival indang shia lir, ibayongji tesüiba küm ka tsüngda Pirate's Cove Beach nung baptisü atema nisung aika mejungjang nung jemi südi," ta metetdaksü.

"Iba kuliji ajanga onoki item sentong ajak dang 'Jesus Revolution Baptism,' ta ajar.

Jesus Revolution film nung noksa balala ajanga nisungtem ajungmesoa kasa tesem nungji baptisü asoshi temelung nung jemi asütsü akok," ta pai ashi.

"Jesus Revolution" film ya Greg Laurie-i 2018 küm züluba Jesus Revolution kaket nung ajemdaker yangluba film lir.

Laurie-i, "Tanela temeshi ajanga kü dang osangtajung sayutsingitsü atema ajungshiba tesemji Pirate's Cove Beach lir. Ibayongji item lung nung nokdaker ni nisungtem dang sayutsingia liasü," ta pai ashi.

July 20 nü Los Angeles nung aliba Angel Stadium nung 2024 Harvest Crusade ayongzükba agi aser iba sentong nungji nisung 5,000 dak temai Khrista nem taküm bendanga agüja liasü.

July 21, 2024 nü Anaheim, California nung aliba Angel Stadium nung ayongzükba Harvest Crusade nung nisung 3,500 dak temai Yisu Khrista agizükba liasü.

Harvest Crusade nungji nungtugu osangtajung kentenerem- Brooke Ligertwood aser Chris Tomlin nati tekülem aser tetushi ania liasü.

Tesüiba küm ka tsüngda nisung 12,000 dak temai Khrista nem taküm bendanga agütsüogo.

"Pirate's Cove ya tasen kümshiba aser teimla anguba tesem ka kümogo," ta pai ashi.

## ANOGO ABEN TSÜNGREM DEN

## TAMANG NUNG TANGATET TAKÜM

Anungji KIBUBAI iba anogo nung ashiba ama, iba tenem linük ya kü nem agüjang; kechiaser idakji Anakim nung aser yimti tulutem jara agi atsübanger koda liasü, asengashiogo; KIBUBAI jembiba, ama kü den adentsü aser ni parnok aridoktsü akok. Yihusua 14:12

Iba Lai ya Kaleb-i pa nem tenem lima agüjang ta ashiba o lir. Kaleb ya kodang reprangdir alar süa aliba lima Egypt nungi Tsüngremi nangzükba lima Kanan tashi ochishir, tasütait, Tsüngrem akhüm tsübuba Tsüngrem tenzüker tajung liasü. Kaleb aser Yihusua tenati dang shitakba itangiter mapa inyak. Aser kodang Israel nungertemi tenangzükba limai arur, nisungtemi ali temo aketba lenden lima agüjang ta meshi. Saka Kaleb-ibo pa nem tenem lima agüjang ta meshi. Aser pa küm 85 tain temang nung tashi ita dang lir, pai tsükchirtemji kokteta Israel nungertem sünepa yutettsü ta ashi. Aser pai meshiba ama pa Hebron tenem nung alitsü Yihusua-i moatsür yok.

Temeimbatem, Kalebi pa tashi akadang Tsüngrem mapa shitak tajungtiba nung inyak aser pei talitsü alima alemdanga pai shinga dena meraktep. Tangarbo lenten lima alitsü raktep dang tenem lima pai meshizük aser pai tsükchir tashi tulutem anüksü nangzük. Tanü Tsüngrem tenzüksü asoshi lamang nung tangateba taküm nungdaker, tasü tait nungdaker, aser ochishir nungdaker. Tangar dang azüzüksü kanga nungdaker, anatia kinunger tsüngda mesüra nüburua alem nung mesüra alimaji lemsa nung koba nung masü Tsüngrem dak jenokdi. shimtsü? Rongsen Tsüngrem den tangatetba nung lidi. Amen.

## Uttar Pradesh nung pastor ka den par Arogo nung züngsem ka apu

**August 03, 2024:** Tawa Uttar Pradesh nung missionary pastor kati par Arogo Tenla ki tanaben lapoktsü atema temepshiba meshiba sülen July 29, 2024 nü police-i pa den par Arogo nung züngsem ka na puogo.

Pastor-i ozüing alema tangartem Khristan yimsü dangi meyipdaksür, ta pa nem tai tonglokja liasü, ta International Christian Concern (ICC)-i metetdaksü.

Pastor Shyam-i Tenla ki tanaben lapoktsü atema temelaba agüjang ta mepishi, ajisüaka pai ajurusang sub-divisional magistrate (SDM)-i pastor mezüngmeshiba sülen police jaa pastor aser pa den alisang na pudaktsü.

Uttar Pradesh nung Anti-conversion Act kübok pastor nem tai tonglokja apu. Hindu yimsü alia amanger kati pastor anema tiyazü nung tai tongloktsüba sülen local news website ka nung, pastor aser pa den külemi inyaksang nati ozüing alema tangar kar Khristan yimsü dangi meyipdaksütsü merang, saka pai nokdangteta liasü, ta osang prokshi.

Pastor Shyam ya Ayodhya kübok jila tilaka nung alir. 2023 küm Hindu nungertemi tashishiba ken o ka agütsüba nung ajemdaker sorkar ketdangsertemi Tenla kiji shibangja liasü.

Küm ka shi lir sülen Pastor Shyam-i police station-i oa

Tenla ki tanaben lapoktsü mepishia liasü, saka police-i pa dang sub-divisional magistrate ajuruang ta ashi.

Iba sülen SDM-i police jar pastor den Arogo nung züngsem ka pudaktsü.

Hindu nationalist telok ka nung coordinator, Pandey Dubey-i tashishiba ken o agütsüba nung ajemdaker Uttar Pradesh Prohibition of Unlawful Religious Conversion Act 2021 aser Bharatiya Nyaya Sanhita (BNS) kübok arlla kar nung ajemdaker Pastor Shyam aser par medemsang na anema ken o benokogo.

Dubey-i police dang, "Pastor Shyam-i kü den ozü medemer pongu aser nisung ka soit, aser onok dang, 'nenoki

Hindu yimsü toktsür Yisu agizükra nenok nisung shia nem sen meyrjang terer (10,000) agütsütsü aser ki angati sütsütsü' ta nangzükba liasü," ta metetdaksü.

Dubey-isa, "Kü den ozü medemertemi Khristan yimsü agizüksü liasü saka tangartemi onok ngua kanga jashi. Hopta ka tejaklen-a Pastor aser par medemsang nati tangartem Khristan yimsü dangi meyipdaksütsü merang, saka aridok ta onok dang ashi. Item osangji angashia ni Khristan yimsü agizüksü memelung," ta pastor nem tai tonglokja liasü.

Tawa Uttar Pradesh sorkari anti-conversion ozüing yanglushia ano ozüing tesashiba benoktsü atema inyaksangshi

tenzükogo.

July 29, 2024 nü Uttar Pradesh state sorkari parnok indang anti-conversion ozüingtem yanglushitsü atema benokogo; item rongnung bail dak sendakba telatetba tesashiba akümtsü aser ozüing alema yimsü meyipdaksüba nung aibelenertem tajemba agia küm 10 nung tenzüka taküm piyong tepuokdak ayutsü densema lir.

Uttar Pradesh nung Chief Minister Yogi Adityanath-i, tamangba yimsü meyipba tebilemtsü onük bentettsü atema Uttar Pradesh Prohibition of Unlawful Conversion of Religion ozüing ya yanglushitsü akümer, ta metetdakja liasü.

**AO OSHI ANGAZÜKDAK:  
TANÜ ANGAZÜKTSÜBA OJANG**



**Takyatako**

(n) yong agi osettsüset atakba, yongsen mapatem (bamboo craft)

\* Kaketreju nung tanurtem dang takyatako mapatem sayutsüla.

**Takzütakpong**

(v) kechi koma ataloktsüar ta bilema shinba (prediction)

\* Tsüraburtemi takzütapong asüba aika shitak ataloker.

**OLONG PAITEP # 6865**

|    |   |    |   |    |  |   |    |
|----|---|----|---|----|--|---|----|
|    | 1 |    |   | 2  |  | 3 | 4  |
| 5  |   |    |   |    |  | 6 |    |
| 7  |   |    | 8 |    |  |   |    |
|    |   |    |   |    |  |   |    |
|    |   |    |   |    |  | 9 |    |
|    |   | 10 |   |    |  |   |    |
| 11 |   |    |   |    |  |   | 12 |
|    |   |    |   | 13 |  |   |    |
|    |   |    |   | 14 |  |   |    |
| 15 |   |    |   |    |  |   |    |
|    |   |    |   |    |  |   |    |

**TIPIEN**

- 1. Balaka - (5)
- 6. Aika shirangba - (4)
- 7. Tar tatsü - (6)
- 9. Nenü'er jabaso - (4)
- 10. Sen latettsüba - (7)
- 11. Tangar kübok alir - (4)
- 14. Lon nung inokba - (6)
- 15. Tzü ayimdak - (4)
- 16. Ajok - (5)

**LANGTSÜNGLEN**

- 2. Hai sür inyak - (4)
- 3. Aor tenüng ka - (6)
- 4. Ali telungi talangka lur - (5)
- 5. Tebang kenyongi mazüoker - (4)
- 8. Ken atema anenzükertem - (5)
- 9. Toktepa noktak - (5)
- 10. Sen - (6)
- 11. Benjong agi - (5)
- 12. Telung nung rizünga ayu - (4)
- 13. Tebang nung enok - (4)

**OLONG PAITEP # 6864 TELANGZÜBA**

**TIPIEN :**

- 1. Yimlibilem, 4. Anak,
- 5. Tangar, 7. Aya, 8. Arong,
- 11. Par, 13. Lemjem, 14. Oagi,
- 15. Molungzüng.

**LANGTSÜNGLEN :**

- 1. Yongya, 2. Moko, 3. Marok,
- 5. Teronem, 6. Nung,
- 8. Amajok, 9. Jangzü,
- 10. belem.

**NAI-A YA METETTER MA**



Union Cabinet-i Guwahati Ring Road Project ta ser Rs 5,729 crore endoka 121-kilometer road yanglutsü agizükogo. Assam Chief Minister Himanta Biswa Sarma-i Prime Minister Narendra Modi aser Union Minister Nitin Gadkari na dang pelaba metetdaksüogo.

North East asoshi 'Gateway City' ta ajaba ama iba mapatong ajanga northeast nung socio-economic development jenjang tajungba akümtsü ta CM Sarma-i ashi.

**Jiribam nung  
lendong atalok**

**Imphal, August 3, 2024**

(Agencies): Meitei aser Hmar nunger tsüingda tensa süngjemtsü atema peace agreement ka nung sign sütepba sülen ghonda ishika dang lir Hokolbar aonung Jiribam kübok Lalpani yimtsüing nung mepetmesü adok.

Yasüing prangpong abener nisung kari injang khatok aser nisung maliba ki ka rongdoktsüba ajanga tensa mejungi kümogo.

August 1 nü Meitei, Hmar, Thadou, Paite aser Mizo nunger tsüingda tensa süngjemtsü atema inyaksü aser tarutsü nung ozüing alema meinyakdaksütsü mulungtepba sülen iba ya atalok.

August 15 nü ano Meitei, Hmar, Thadou, Paite aser Mizo nunger tsüingda senden ka amentsü lir aser idangji parnoki yimjung atema telemtetba kar agitsü akok.

**MENUNGRA BILEMTETER**



**Asür Imnamoa**

Temeim jabaso na onok nungi pila-a or küm ka ajungba anogo tanü onoki na kanga menungraseta sarasadema amonger. Anogo shia aser mapang ajak nung nü temeim aser anepalu teti onok mulungjang nung alir.

- Temeim Oja, Oya, Odi, Aunty aser kinungertem.

**Kuki-Zo Remembrance Day nung Assam Rifles magientsü akhanger**

**Imphal, August 3, 2024**

(Agencies): Kuki-Zo nunger 15th Remembrance Day nung sentong balala ayongzüka mungogo. Iba anogomung nung Assam Rifles agientsü tebilemba atema süoki ia bilemba lemsatop.

Kuki-Zo nunger meyrjang aika Gamgiphai nung aliba Sadar Hills nung adenshi. Nisungtem kilometer 1 tashi atongtepa Gamgiphai nungi Charhajare tashi orr meyipa aru.

Parnoki sorkar dang Assam Rifles agientsü lemtetba meyipa agitsü takhangba agütsü. Assam Rifles aliba ajanga kin o kin rara

nung yimjung bener arutsü aser nübortem kümzüka ayutsü ta Kuki-Zo nungeri ashi.

Manipur nung kin o kin rara nung taküm bendanga agütsür Kuki-Zo nunger nem tetushi agüja iba anogomung tembang.

"Onok 15th Remembrance Day ya tetsübu tia ka nung amonger kechiyong Home Minister-i Kuki-Zo nunger alidak nungi Assam Rifles agientsü lemtetogo" ta CoTU Spokesperson Ng. Lun Kipgen-i ashi.

"Assam Rifles-i tensa tamajung nung Kuki-Zo aser Meitei nunger ajak kümzüka

arur. Kuki-Zo nunger Imphal nungi Hill Districts aser Meitei nunger Hill Districts nungi lendenleni anir aoba nung parnoki tongtipang shilem agiogo" ta pai ashi.

"Kodaser tensa azioka ayur aser shinga tsütsü meshii tiyongtsü nung inyaktertem merenshir?"

Kuki-Zo nunger alidak tanga forces kar yutsütsü sentong lir" ta Kipgen-i ashi.

"Friends of the Hills People" ta ajar Assam Rifles agientsü lemtet meyipa magira onoki lungkak aittsü ta Committee on Tribal Unity (CoTU)-ia metetdaksüogo.

**Assam ya global electronic hub akümtsü: Himanta Biswa Sarma**

**Guwahati, August 3, 2024**

(Agencies): Assam ya taruba global electronic hub akümtsü ta Chief Minister Himanta Biswa Sarma-i ashi.

Jagiroad nung Tata Semiconductor facility indang Bhumi Pujan agiogo. Rs 27,000 crore plant ajanga mapa 27,000 tema adoktsü aser world-class industrial ecosystem atsür arutsü ta CM Sarma-i ashi.

Prime Minister Narendra Modi aser tangartemi Assam nung iba tongtipang mapatong inyaksü shimba atema pelar ta pai ashi.

"Onoki Jagiroad nung semiconductor industry ka lapoktsü. Group assessment ajanga iba industry ita 18 nung renemtsü. Tanü bhumi puja agiogo aser tanü nungi tenzüker ita 18 tsüingda production unit lapoktsü" ta CM Sarma-i ashi.

"Assam nunger tenüng nung ni Prime Minister Narendra Modi aser tangartem den iba mapa tajung atema pelaba metetdaksür. Parnoki iba mapatong ya India kübok tanga tesem ka nung inyakla saka



parnoki Assam shimtet. Iba ya Assam state atema mapa tulu ka lir" ta paisa metetdaksü.

"Iba semiconductor industry ya electronics, automobiles aser healthcare amala sector balala atema tongtipang lir. Modi lenisüba kübok iba tasütait mapa inyakba aser iba nung Tata Group-i shilem agiba atema pelar" ta Tata Group Chairman N. Chandrasekaran-i ashi.

"Iba semiconductor industry ya tarutsü atema tamendakdak industry ka lir. Anogoshia asen taküm nung chips adentsü, electronics industry,

automobiles, mobile technology, defence, healthcare mesüra tanga consumer products ajak nung chips amshitsü. Anungji Narendra Modi lenisüba kübok iba tasütait mapa tenzüker aser iba maparen nung Tata Group adenba atema kanga nüma atanger" ta N. Chandrasekaran-isa ashi.

"Iba facility tasen ajanga mapa 27,000- direct 15,000 aser indirect positions 12,000 adoktsü. Iba ajanga semiconductor ecosystem tajung akümtsü aser company balalai alizüksü" ta paisa ashi.

# Vietnam tir To Lam Communist Party tekolakba kümogo



To Lam

indang tsüingsü nung anidaktsü, foreign policy nung kecha temelenshi bener marutsü, Vietnam sobaliba aser rongsenketzüng terenlok asoshi nükjidongtem dak rangloker inyaktsü aser maneni ochi mashi inyakyim anema nokdaktsü tenangzüka agüja liasü.

"Tarutsü nunga ochi mashi inyakyim anema maneni sashisashia raratsü," ta Lam-i osangbenertem den sensaksemba mapang ashi. "Ni police ministry nung inyakba mapang antigraft campaign nung shilem agiogo anungji iba ken o dak sendakba nung ni tajangshiba aika lir," ta pai ashi.

Police minister ka ama ochimashi inyakyim anema bushisüngdang takok ngua benoka inyakba sülen Lam ya May ita tir aküm. Pai, Vo Van Thuong melen, shibai küm ka shi iba mapa abenba sülen aibelen kar menaba atema taitsuba balala adoker aliba mapang mapa tokja laisü.

Arishi küm 67 tain lenir yagi Trong asütsü anogo ka lia July 18 nü khen atema party tekolak

mapa agizüka liasü. Honibarnü pai, party lenitsü nungdaka akümba ajanga pai iba mapang agizüker ta ashi.

Lam-i 2026 küm legislative session tembangba tashi mapa anaprongla arepa abentsü asü tir tasen ka shimtsü iba indang osang tejangja memetet.

Ketdangsürtem aser diplomat temi ashiba agi, tir tasen ka shimtsü asoshi party yongtsü nung sensaksemogo, ajita asünungdang Lam-i party tekolak mapa dak rangloker inyaktetsü, ta Reuters-i ashi. Sensaksem maneni agia alitsü akok, ta diplomat kati Honibarnü Reuters dang ashi.

Lam-i mapa anaprongla benra pa tashi tali akümstü aser Xi Jinping, shiba China Communist Party tekolakba aser tir lir pa ama tashi ulura amshitsü akok, ta ken o asadangertemi ashi

Yamaji süra Veitnam atema temelenshi ka asütsü, kong telemtetbatem ajak arok mulungka nung agir aser lenirtema talenba balala kübok lir.

**Hanoi, Luroi/August 3 (Agencies):** Communist Party tekolak mapa abentsü atema Vietnam tir To Lam Honibarnü formally sangdongogo. Iba ya linük nung mapa tulutiba lir. Taoba general secretary asüba sülen hopta ana lir tang Lam nem iba mapa agütsüogo.

2011 küm party tekolakba akümba sülen Nguyen Phu Trong-i Vietnam nung yimden yimsüsüba amokbanger liasü aser pa July 19 nü süogo.

Party tekolakba ama Honibarnü mezüngbuba o jembiba mapang Lam-i, Trong

# Somalia yimtiba Mogadishu nung nisung 32 tepset



Somalia yimtiba Mogadishu kübok Lido Beach nung pei temang nung bomb alenoker pokdaktsür kati bomb pokdaktsüba sülen nüburtemi tetsür ka tasümgang bener aoba noksa nung angur.

**Mogadishu, Luroi/August 3 (Agencies):** Somalia yimtiba, Mogadishu kübok nungtugu tzüküm ka pei temang nung bomb aneloker pokdaktsürtem aser prangbong amshia amakba sülen nisung 32 süogo aser aika yiruogo.

Al-Qaeda den sendaktepa aliba kiralongrar telok Al-Shabab puri parnok indang radio station ajanga Hokolbarnü Lido Beach amakba nangzüko.

Pei temang nung bomb alenoker pokdaktsür kati Beach View Hotel kikümtong nung bomb pokdaktsüba sülen iba tzüken amak tenzüka liasü. Iba sülen kiralongrartemi iba hotel telungi aitsü merang aser tzüküm nung alirtem dak injang khalokja liasü, kong nüburtem aika adenshia liasü, ta tenük kuli agütsürtem aser police-i ashi.

"Iba tesem amakba sülen nisung 32 dak tema süogo aser nisung 63 yiruogo. Nisungtem karbo kanga mejungi yirur lir," ta police otongdar Abdifatah Adan Hassan-i osangbenertem dang ashi.

Paisa, security force temi iba tesem amakertem ajak tepsetogo aser gari ka nung bomb inoker bener arua aliba

nisung ka puogo. Sepai ka tepsetogo aser tanga sepai ka yirua liasü, ta ashi.

Tenük kuli agütsür kati Associated Press news agency dang phone ajanga ashiba agi, pai iba tesem amaker ka temang nung bomb alenoker aruba angu aser pasasa Beach View Hotel anasa pai alenoker aliba bombji pokdaktsü. Mohamud Moalimisa, pa den külemi hotel nung mungzüka alir par medemer kar tepset aser kar yirua liasü, ta ashi.

"Nisung ajak aoksatep aser bomb apokba sülen injang akha tenzüker aser ibayongji kechi atalokerar mejangjai liasü," ta tenük kuli agütsürsa Abdilatif Ali-i AFP news agency dang ashiba den nüburtem kar ali nung remdaka mejang aser kar tejenok dak bushia jenshia liasü, ta shisem.

Somalia indang federal sorkari iba tesem amakba aitsüogo, ta state media-i Honibarnü sangdong ka ajanga metetdaktsü.

X nung post ka ajanga taoba Ato Kilonser Hassan Ali Khaire-i, asür kinunger aser medemertem den asükhü lemsatepogo.

Lido Beach ya Mogadishu nung kanga nungtugu tesem ka lir aser nüburtem Hokolbar aonung sütoksünema kazütepa aliba mapang iba tesem amak. Taoba mapanga iba tesem ya al-Shabab puri makogo.

Al-Shabab pur küm 17 dak team central sorkar atsüngtoktsü atema rara arudar aser parnoki linük yimtiba aser linük kübok tesem balala aiben maka arudar.

Item kiralongrartem den raratsü atema sorkar bendanger sepaitem dak metaloker arudar. Maneni al-Shabab pur den raratsü atema sorkar aser local telungpurtem longjemer lir, shirnok nem African Union sepaitemi aser United States-i anüing ajanga teyari agüja arudar.

Ajisüaka al-Shabab puri taküm küm tetenzüklen ashiba agi, parnoki linük kübok tesem balala aika atsüngogo.

June ita Somalia-i, African peacekeeping mission, koba dang ATMIS ta ajar parnok atsüngintsü aliba meyilongi dang atsüngintsü ayongzüka liasü. ATMIS ya December 31 nü tashi nungbo atsüngintsü imlar.

# MULUNGNEN O



Tasüba anogo - 28 July 2024

Onoki teti meima aliba tsürabur asür I. Moea Pongener (Ungma), ajungbena alima nungi piladang shirnokisa mangyim jashi lemsatepa sarasadem, nübu, rongsen aser tesünep o agi onok mulung süngzüka yariogo, nenok ajak dang kanga pelaba lemsateper. Onoki nenok nem meyipa agütsütsü kecha maka, saka Tulusang Tsüngremi nenok taküm aser kibong tali moajangma.

- Temeim kinungtsü, chirnur aser semchirtem

# MENUNGRA BILEMTETER Sür küm 25 ajungba

**Asür Suboliba Imsong (Kangtsüng)**

Temeim Oba,

Tanü nai onok toktsür orr küm metsür pongu (25 yrs) süitema oaka, onok mulungjang nungi nai akümlir nem rizünga toktsür aoba ali rongsen, taküm libaliro, tatishitsü tajung, mapa tajungtem onok mulungjangi teti bilemteta menungra amonger.

'Kechiaser ni asoshi taküm alibaji Khrista aser tasübaji tajangzük lir'. - Filipi 1:21.

**Mamatetba Kinungtsü, Chirnur, Semchirtem, Anükapang & Kinunger.**



ASO : 07/05/1945 ASU : 04/08/1999

# Bangladesh nung kaketshirtemi asendenshir longkak aiter

**Dhaka, Luroi/August 3**

**(Agencies):** Bangladesh nung taoba ita kaketshirtemi anir, sorkar mapa mekazüka toktsüba dak sendakba nung longkak aitba mapang nisung 200 dak tema tepsetba atema ochi obendang khanga ano longkak ait tenzüko.

Kaketshir lenirtemi linük ajunga nung civil disobedience campaign ka asoshi ayongzüka sülen Honibarnü longkak aitertem aika adenshia liasü aser iba ajanga Ato Kilonser Sheikh Hasina-i aniba sorkar tali nongshi tenzüko.

Dhaka nungi Al Jazeera osangbener Tanvir Chowdhury-i ashiba agi, linük yimtiba tezülen Gazipur aser Comilla district nung longkak aitertem aser police na tsüngda mangatettep adoka liasü.

Paisa, kaketshirtemi tenzüka longkak aiba sentong ya nüburtem ajak indang longkak aitba sentong ka kümogo, ta ashiba den Honibarnü wadang balala nungi nüburtem aika adenshia longkak ait aser sorkar loksatsü takhangba agüja liasü.

Kasa mapang nung PM Hasina-i, Honibarnü longkak aitba sentong anirtem dang la den Ganabhaban nung lar kidang ajuruteptsü ayongzüko aser ashiba agi, "kishi lapoka dang lir".

"Ni kaketshir lenirtem den sensaksema parnok teblemstü angadangner. Ni mangatettep kecha maginer," ta lai ashiba local media sangdong balala ajanga metetdaktsü.

Ato Kilonserisa, longkak

aitertem den sensakasemtsü atema ketdangsür tejen asem shimogo, ta Chowdhury-i metetdaktsü.

Ajisüaka July ita mezüngbuba longkak aitba sentong ayongzüka telok; Students Against Discrimination puri Deobarnü nungi tenzüka linük ajunga nung non-cooperation movement ka ayongzüko.

"Iba longkak aitba sentong nung saru aser utility bills magütsüba, sorkar tenzükertemi longkak aitba aser bendanglen nungi bank ajanga senotsü yokba ajak anena atatsüba densema lir," ta iba telok nungi Asif Mahmud-i AFP dang ashi.

Bangladesh nung lanur million 18 shi mapa mongui lir aser sorkari mapa tali mekazüka toktsüba ajanga mapa mongui aliba graduate tem kanga mepeladaktsü liasü.

Longkak aitba sentong ya yimjung nung dang agia liasü, saka police aser sorkar pusemba kaketshir lokti tentettemi longkak aitertem amak tenzüka sülen mepetmesü tulu adoka liasü.

Iba sülen Hasina-i aniba sorkari linük ajunga nung curfew benok, sepaitem yok aser anogo 11 tashi linük ajunga nung mobile internet network shibangja liasü.

Home Minister Asaduzzaman Khan-i osangbenertem dang ashiba agi, security force temi kanga azüzüka inyakogo, saka parnoki sorkar kiojentem kümzüka ayutsü atema injang khaloktsütsüsa aküm.

## Olympics: Archer Deepika Kumari quarter final nung tsükogo



Deepika Kumari

**Luroi/August 3, 2024 (Agencies):** India tsürtem rongnungi nungtugu archer Deepika Kumari-i, Honibarnü tetsür kija asaya quarterfinals nung Korea tsür Suhyeon Nam-i 4-6 agi tsükdaksüba sülen India nung archer tem ajak tsükogo.

Lai elimination round nung Germany tsür Michelle Kroppen 6-4 agi koka quarterfinal-i ia liasü saka Suhyeon majangtet.

Tanga asaya ka nung India tsür Bhajan-ia kanga meranga

asaya saka lai Indonesia tsür Choirunisa 5-6 agi mekoki tsükogo.

Deepika shiba tanur ka tetsü akümba sülen tang mezüngbuba Olympics nung asaya liasü lai taküm kanga junga asayaogo aser medal kabo angutsü imla liasü.

Kasa asayamung tebur badminton asaya nung Lakshya Sen taküm mezüngbuba Olympics nung asayar aser pai Hokolbarnü quarterfinals nung 12th seed Chinese Taipei nung asayar

Chou Tien Chen kokogo.

Quarterfinals asaya nung Sen-i set asem kanga toktepa asayaba sülen asaya 19-21, 21-15, 21-12 agi Chou Tien Chen madak takok ngua liasü.

Sen-i Indonesia nung asayar Jonatan Christie aser külem India nung asayar HS Prannoy na koka quarterfinal-i ai aser pa Parupalli Kashyap aser Kidambi Srikanth na den densema India nung tebur asayatem rongnungi Olympics nung quarterfinals tonga asayaba asayar tasembuba aküm.

Hokolbarnü iba asaya akokba sülen Sen ya India nung tebur asayatem rongnungi Olympics nung tebur jika asaya nung semifinal tonga asayaba mezüngbuba asayar kümogo.

August 4 nü semifinal nung pa Loh Kean Yew mesüra Viktor Axelsen na rongnung ka den asayatsü.

Badminton asaya nung India nung asayatem ajak tsükogo aser sen kija anunga lir, anungji iba asaya nung medal angutsü pa dak tamang ayur.

## 7buba Masters Games Himachal nung asayatsü



**Kohima, Luroi/August 3 (Agencies):** Nagaland Masters Games Association (NMGGA) vice president Roko Angami-i sangdong ka ajanga, Super Masters Games & Sports Federation (SMGSF), India Advisory Board senden, Constitution Club of India, New Delhi nung Honibarnü menogo, ta metetdaksü.

Angami-i ashiba agi, iba senden ya Director CEO SMGSF India, Vinod Kumar lenisüba nung agi, aser state 11 nung senden nung shilem agir züngsem 12 prongla metetpelaba mapa agia liasü.

Sensaksem agiba mapang SMGSF-i, February ita Goa nung agiba 6buba Master Games 2024 lepareprangshia liasü.

Senden nungsa 7buba Masters' Games Himachal

Pradesh kübok Dharamshala nung 2025 küm February 22 nungi 28 tashi asayatsü telemtetba agiogo.

Taruba asayamung nung asayatsü aliba asayatem rongnung athletics, archery, arm wrestling, basketball, handball, volleyball, football, kabaddi, judo, dart, badminton, weightlifting, powerlifting, chess, tug-of-war aser swimming densema lir, ta paisa metetdaksü.

Züngsemtemisa, 2025 küm May 12 nungi 30 tashi Taiwan nung asayatsü aliba World Masters Games nung shilem agitsü telemtetba agiogo.

Maneni senden nung SMGSF India inyakyim tajungba küma ajungkettsü atema onük balala benoka sensaksema liasü, ta Roko-isa metetdaksü.

## World No. 1 Iga Swiatek WTA Toronto Event nung masayatsü



Iga Swiatek

**Luroi/August 3, 2024 (Agencies):** Poland tsür World number one Iga Swiatek taruba hopta Toronto nung asayatsü aliba WTA event nung shilem magitsü telemtetba agiogo. Paris Olympics nung bronze medal ngua asayaba mapang kanga belematokba ajanga lai iba telemtetba agi.

Grand Slam pongutashi koker alila, shibai taküm French Open asem buba atonga kokogo, lai Olympics nung bronze medal atema asayaba mapang Slovakia tsür Anna Karolina Schmiedlova 6-2, 6-1 agi koka liasü.

"Taoba hopta ana kanga belema asayaba ajanga ni Toronto nung asayatsü aliba asayamung nung shilem magitsü telemtetba agiba sasaset sangdonger," ta Swiatek-i ashi.

"Tennis asayamungtem

kanga atonga asayaba aser takübok Olympics dena asayaba aser asayaba tesem melenshia asayaba ajanga ni US Open nung amena lia asayatettsü asoshi anisüngzüksü asoshi mapang timba nüngdaker," ta lai ashi.

Top-10 nung aliba asayar trok tashi Toronto nung asayatsü aliba asayamung nung shilem magitsü telemtetba agiogo.

Wimbledon champion Barbora Krejčíková, yiruba ajanga iba asayamung nung masayatettsüsa kümogo. Czech tsür la ya Paris nung kija aser tarep asaya nung quarterfinals tonga asaya liasü.

Kasa mapang nung jenjang pezübuba nung alila Elena Rybakina-a temang nung timtem aliba ajanga Paris nung masayatet aser Toronto nung masayatettsü.

Toronto nung masayatsü asoshi telemtetba agiba asayatem rongnung ano Italy tsür fifth-ranked Jasmine Paolini, Greece tsür eighth-ranked Maria Sakkari, ninth-ranked America tsür Danielle Collins, 18th-ranked Czech tsür Marketa Vondroušová aser 26th-ranked France tsür Caroline Garcia nung densema lir.

US Open tesüsabuba koker alila Coco Gauff aser Belarus tsür Aryna Sabalenka ya Toronto nung top seeds asayar asütsü.

Asayatem aikati asayamung nung shilem magitsü atema telemtetba agiba sülen 2020 Australian Open champion Sofia Kenin aser 2017 US Open champion Sloane Stephens na aser taoba mapang world number one asayar Karolina Plisková nung main draw-i iogo.

## Dortmund-i Defender Yan Couto loan nung anirogo

**Luroi/August 3, 2024 (Agencies):** Borussia Dortmund-i Honibarnü sangdong ka ajanga Brazil nung defender Yan Couto Manchester City nungi laon nung aruba metetdaksüogo. Pa 2025 küm June 30 tashi asayatsü aser iba sülen teti atema Dortmund nungi asayatsü asoshi tenangzüktepa yanglutsü akok.

Arishi küm 22 tain asayar ya La Liga club Girona nung season ana loan nung oa asayaba sülen tang Dortmund-i ogo. Girona pur taoba season tasembuba jenjang tonga asayaba mapang pai teyari agüja liasü.

Spain nung La Liga asaya 59 asayaba mapang defender yagi goal ana idaktsü aser assist 12 süja liasü.

Dortmund indang sporting director Sebastian Kehl-i, Couto ya jangrademtsü asayar ka lir ta ashi.

"Pa Spain nung asayaba mapang kanga renlokogo aser ano maneni renloka aotsü sempet lir aser iba ajanga onoki iba position atema pa nüngdaka liasü," ta pai ashi.

Arishi küm 21 asüba mapang Brazil tenung nungi mezüng asayaba sülen Couto linük tenung nungi tang tashi nung



Yan Couto

pezüben asayar lir.

Pa 2020 küm arishi küm 17 asüba mapang Coritiba FC nungi küm pongu atema euro million trok yong Man City nung oa aden, saka Pep Guardiola-i aniba team nungi khen danga masaya.

"Kü atema iba ya nükjidong atalokba ka lir," ta Couto-i ashi.

"Borussia Dortmund ya club balaka lir. Brazil nung aliba tanurtem ajaki iba club koda tajung aji meteta lir.

"Ni BVB tola semer mezüngbuba asayatsü atema yongtaseta atar," ta Couto-i ashi.

Season tasenba metenzük tsüngda Dortmund puri asayar alizükba rongnung Couto ta pezübuba lir. Parnoki Stuttgart nungi striker Serhou Guirassy aser defender Waldemar Anton na aser Germany nung midfielder Pascal Gross alizükogo.

## BILEMDANGANG

"Tetsüba agi nisung ka amokseper."